

**Aalisarneq pillugu Inatsisartut inatsisaata nr. 18-ip, 31 oktober 1996-imeersup allanngortinnissaanut Inatsisartut inatsisissaattut nr. xx xx 2011-imeersutut siunnersuut**  
(Piginnittuunermut tunngasut kiisalu pisassiissutit qaffasinnerpaaffissaannik killiliinerup allanngortinnissaat)

*Saqqummiussivoq Naalakkersuisunut ilaasortaq Ane Hansen, Inuit Ataqtigiit*

**pillugu**

**Aalisarnermut, Piniarnermut Nunalerinermullu ataatsimiititaliap isumaliutissiissutaa.**

**Siunnersuutip aappassaaneerneqarnerani saqqummiunneqartoq.**

Aalisarnermut, Piniarnermut Nunalerinermullu ataatsimiititaliap suliarinninnerani ilaasortat uku ilaapput:

Inatsisartunut ilaasortaq Aqqaluaq B. Egede, Inuit Ataqtigiit, Siulittaasoq  
Inatsisartunut ilaasortaq Niels Thomsen, Demokraatit, Siulittaasup tullia  
Inatsisartunut ilaasortaq Juliane Henningsen, Inuit Ataqtigiit  
Inatsisartunut ilaasortaq Hans Aronsen, Inuit Ataqtigiit  
Inatsisartunut ilaasortaq Karl Lyberth, Siumut  
Inatsisartunut ilaasortaq Hans Enoksen, Siumut  
Inatsisartunut ilaasortaq Finn Karlsen, Siumut

UPA 2011-mi ulloq 13. april siullermeerereernerup kingorna siunnersuut Ataatsimiititaliap misissorpaa.

**Siunnersuutip imaa aamma siunertaa**

Inatsisissatut siunnersuummi siunertaavoq aalisarnermik inuussutissarsiornermi ineriartornerup kingunerisaanik killiuliussatut atugassaritinneqartut aaqqiivigineqarnissaat.

Siunnersuutip kinguneraa Aalisarneq pillugu inatsimmi § 6, imm. 3 nr. 4-p, § 6, imm. 4 nr. 3-p aamma § 6, imm. 5 nr. 2-p aamma 3-p atorunnaarsinneqarnerat, taamaasillunilu aalisariutinik piginnittunut Kalaallit Nunaanni inuussutissarsiuutugalugu aalisarusuttunut ukiuni kingullerni marlunni aalisarnermik ingerlataqarsimanissaat aamma isertitat tamarmiusut

4. november 2011

UKA 2011/35

(FM 2011/88)

ikinnerpaamik affaasa inuussutissarsiutigalugu aalisarnermit sulianilluunniit tassunga tunngasuteqartumit isertitaasimanissaat piumasqaataajunnaassalluni.

Siunnersuutittaaq kingunerissavaa Aalisarnej pillugu inatsimmi § 15, imm. 4-p allanngortinneqarnissaa, taamaalilluni sinerissap qanittuani aalisarnermi pisassiissutit qummut killingi 10 %-iniit 15 %-imut qaffanneqassallutik.

Siunnersuutini Naalakkersuisut makku pingaarnertut anguniarpaat:

- Sapinngisamik pisortanit tapiissuteqarfiunngitsumik aalisariutininik sinerissamut qanittumi aalisartuusunik nutarterinikkut aalisartut ataasiakkaat isertitaqarnerulernissaat.
- Aalisarnermik ingerlatsinermi isertitaqarnerulernissaq taamatullu pisuussutininik atuinermi erniat annertunerulernissaat.

Allannguutit marluusut aallaavigalugit aalisarnerup aningaasalersorneqarnerata aalisariutillu nutarterneqarnissaat siamasissumik periarfissaqarnissaa Naalakkersuisut anguniarpaat, ullumikkummi aalisariutit pisoqalisut aserfallatsaaliuinermit qaffasissumik aningaasartuuteqarnej killilimillu ingerlatsisinnaaneq annertuumik ilisisarnaatigimmassuk. Isumalluutit atorluarnerunerisigut aalisarnerup pitsaaneruumik unammillersinnaasup aalisartunut inuiaqatigiinnullu iluaqutaaneruumik pilersinneqarnissaa taamaalilluni periarfissiuunneqassaaq, taamaalillunilu naggataagut aalisarnermik inuussutissarsiuat aningaasarsiorinikkut imminut napatittoq ataavartumillu imminut pisariaqartutigut naleqqussarsinnaasooq pilersinneqassalluni.

Allannguutit siunnersuutigineqartut Aalisarnej pillugu Ataatsimiititaliarsuup isumaliutersutaanut februar 2009-meersumut aamma 2011-imi upernaakkut Grønlands Revisionskontor A/S-ip suliaanut “Raajat pillugu Paasiniaaqqissaarnej”-mut naapertuupput, tassani inerniuliunneqarami: *“aalisarnej imminut akilersinnaasooq angusaqarfiulluartumik ingerl akkaanni, aalisarnej imminut akilersinnaasooq angusaqarfigissallugu periarfissaqarpoq.”* Paasiniaaqqissaarnermi tassani aamma aaqqissuussaanermi naleqqussaaneq pisariaqartutut taaneqarpoq.

Naalakkersuisunit siunertaavoq § 6-ip allanngortinneratigut aalisartut akornanniinngitsunit, tassa avataneersunit” aalisarnermi aningaasaliinissamut periarfissaq ammaanneqassammat, aalisarnermik inuussutissarsiutillit aalisariutininik aningaasaliinissamut aningaasanik amerlasuunik pisariaqartunik amigaateqarnerat pissutigalugu. Taamaalilluni inatsisip allanngorneratigut allat aalisartut akornanniinngitsut assersuutigalugu inuit ataasiakkaat imaluunniit kalaallit suliffeqarfii imaluunniit ingerlatseqatigiiffii allat aalisarnermik inuussutissarsiuteqarnermut aningaasaliisinaanerat periarfissaalissaaq.

4. november 2011

UKA 2011/35  
(FM 2011/88)

Maanna § 6-ip ilusilerneqarneratigut malunnarsimavortaaq sinerissap qanittuani aalisarnerup aaqjissuussaanerata naleqqussarneranut tamanna akornutaasoq. Assersuutigalu kinguaariit nikinnerannut atatillugu aalisarnermik inuussutissarsiuteqartut aalisarnermik ingerlatsiunnaarsinnaanerata aalajangersakkakkut ajornakusoortinneqarsimavoq, ilaatigullu allatigut isertitaqarnissamut periarfissarsiornissamut inuussutissarsiutigalugu aalisartut iliuseqartanginnerannut pissutaaqataasimavoq, aalisarnermummi akuersissutip annaanissaa mianerisariaqarmat.

Inatsisip allangorneratigut aningaasat nunanit allaneersut atorlugit Kalaallit Nunaanni aalisarnermut pisinissap periarfissaanera ammaanneqanngilaq, taamaalilluni Kalaallit Nunaanni isumalluutit allanit pissarsiarineqarsinnaanatik.

Aamma siunnersuutip akuerineratigut allaffissornikkut oqilisaaneq anguneqassaaq, akuersissummik qinnuteqartup ukiuni siuliini marlunni isertitaqartarnermik atugai pisortanit misissorneqartarunnaassammata.

Naalakkersuisunit siunertarineqarpoq § 15-ip allangortinneratigut ingerlatat annertunerusut pilersinnissaannut aalisartut akunnerminni suleqatigiilersinnaanerata, taamaaliornikkullu annertuumik ingerlatsinerup iluaqutissartai pillugit nalinginnaasumik isumaqarneq pissutigalugu aalisariutit nutarterneqarnissaannut pitsaaneruseqarfillu ingerlatsisinnaanissaannut aningaasalersuineq periarfissaalluarnersammata.

Allannguutissatut siunnersuutip immikkoortua una aamma Aalisarneq pillugu Ataatsimiititaliarsuup isumaliutersuutaanut naapertuuppoq.

Inatsisartut inatsisaat ulloq 1. januar 2012 atuutilissasoq siunnersuutigineqarpoq.

### **Siunnersuutip Inatsisartuni siullermeerneqarnera**

Allannguutissatut siunnersuut ulloq 13. april 2011 siullermeerneqarpoq. Oqallinnermut atatillugu oqaatigineqartut Ataatsimiititaliap innersuussutigivai.

### **2010-mi aasakkut Aalisarnermut, Piniarnermut Nunalerinermullu Naalakkersuisoqarfiup tusarniaanera**

Tusarniaanermit akissutit inatsisissatut siunnersuummut ilanngunneqarput.

Aalisarneq pillugu inatsimmut nutaamut siunnersuut 2010-mi aasakkut susassaqartunut attuumassutilinnut qaammatini marlussunni Naalakkersuisoqarfimmit

4. november 2011

UKA 2011/35  
(FM 2011/88)

tusarniaassutigineqarpoq. Tusarniaassummi nassiunneqartumi inatsisissatut siunnersuummi nassiunneqartumi Aalisarneq pillugu inatsisimmi maanna attuuttumi § 6 allannguuteqanngitsoq takuneqarsinnaavoq, taamaalillunilu maanna § 6-imut allannguutissatut siunnersuutigineqartumut isertitat tamarmiusut ikinnerpaamik affaasa inuussutissarsiutigalugu aalisarnermit isertitaasimanissaat piumasqaataajunnaassasoq pillugu isummernissamut tusarniarneqartut periarfissaqarsimangillat.

Tusarniaanermi piffissarititap naanerani Aalisarnermut, Piniarnermut Nunalerinermullu Naalackersuisoqarfimmit tusarniaanermi akissutit ukunanit tiguneqarsimapput:

Siulittaasup Naalackersuisoqarfia, Inatsiseqarnermut Allaffik, Pinngortitaleriffik, Royal Greenland, Ineqarnermut, Attaveqarnermut Angallanermullu Naalackersuisoqarfik, Inuussutissarsiornermut Suliffeqarnermullu Naalackersuisoqarfik, Aningaasaqarnermut Naalackersuisoqarfik, Peqqinnissamut Naalackersuisoqarfik, EU (DG-MARE), Nunamut Namminermut, Pinngortitamut Avatangiisinullu Naalackersuisoqarfik, Grønlands Kommando, KANUKOKA, KNAPK, NUSUKA, Grønlands Revisionskontor, Advokatfirmaet Kormann Reumert, Isumaginninnermut Naalackersuisoqarfik, Kalaallit Nunaanni Sulisitsisut Peqatigiiffiat (ilaallutik ilaasortat sinnerlugit akissutit, AP, Revisionsfirmaet Deloitte aamma Grønlandsbanken).

2010-mi tusarniaanermi akissutit taaneqartutut aalisarneq pillugu inatsisissatut nutaamut tamarmiusumut siunnersuummut tunngassuteqarput, tassanilu ilaanngilaq § 6-ip allanngortinnissaanut siunnersuut, akissutit taakku isumaliutissiissummi uani **ilanngussaq 1-tut** ilanngunneqarput.

### **Aalisarnermut, Piniarnermut Nunalerinermullu ataatsimiititaliap 2011-mi aasap naajartornerani tusarniaanera**

Ulloq 18. marts 2011 ilaatigut Aalisarnermut, Piniarnermut Nunalerinermullu Naalackersuisup Ane Hansenip aamma Aalisarnermut ataatsimiititaliap akornanni paasissutissiilluni ataatsimeeqatigiinnermi Naalackersuisumit ilisimatitsissutigineqarpoq tusarniarnermi piffissarititaasup kingorna KNAPK-p aamma Sulisitsisut ataatsimeeqatigineqarsimasut. Paasissutissiilluni atatsimeeqatigiinnernit oqaasiinnartigut ingerlanneqartutigit imaqarnialiaqarnersoq takussutissaqanngilaq.

Ulloq 18. maj 2011 allakkatigut aamma ilaatigut Aalisarnermut, Piniarnermut Nunalerinermullu Naalackersuisoq Ane Hansen Ataatsimiititaliamit aperineqarpoq § 6 pillugu allannguutissatut siunnersuutit pillugit tusarniaanerit qaqugu naammassineqassanersut naatsorsuutigineraa. Ulloq 15. juni 2011 allakkatigut akissuteqarnermini Ane Hansen

4. november 2011

UKA 2011/35

(FM 2011/88)

ilisimatitsivoq allannguutissat siunnersuut pineqartoq pillugu tusarniaanissamik pilersaaruteqarani.

Aalisarnermut, Piniarnermut Nunalerinermullu ataatsimiititaliap ilisimalluarpa tusarniaanerit ingerlanneqarnissaat pisussaaffiunngitsoq, kiisalu tusarniaanermit akissutit tiguneqartut inatsisissatut siunnersuutip suliarinerata ingerlaqqinnerani taamaallaat siunnersiunerusartut. Pineqartumi oqallinneq pisoq tunuliaqutaralugu Aalisarneq pillugu inatsisip allanngortinnissaanut siunnersuutit kingulliit pillugit tusarniaasoqannginnera Ataatsimiititaliap ajuusaarnartutut pissusissamisunngitsutullu isigisimavaa, taamaattumillu allannguutissatut siunnersuummik suliarinninnerminut atatillugu namminerisaminik aalajangerpaa § 6, imm. 3-p allanngortinnissaanut immikkut siunertaqarluni tusarniaassutiginiarlugu. Tamatuma kingorna siunnersuut 30. august 2011 allakkatigut ukununnga tusarniaassutitut nassiunneqarpoq:

Royal Greenland, Polar Seafood, KANUKOKA, KNAPK, NUSUKA, Sulisitsisut aamma Grønlands Revisionskontor.

Aalisarnermut, Piniarnermut Nunalerinermullu ataatsimiititaliap tusarniaassutaa nassiunneqartoq aallaavigalugu tusarniaanermit akissutit isumaliutissiissumi uani **ilanngussaq nr. 2**-tut ilanngunnerput.

### **Isumasioqatigiinneq**

Aalisarnermut, Piniarnermut Nunalerinermullu ataatsimiititaliap siunnersuummik suliaqarnerminut atatillugu Aalisarnermut, Piniarnermut Nunalerinermullu Naalakkersuisumik Ane Hansenimik ulloq 12. april 2011 isumasioqateqarsimavoq.

Aamma ulloq 24. oktober 2011 paasissutissiilluni ataatsimiittoqarpoq, tassani Naalakkersuisunut ilaasortaq Aalisarneq pillugu inatsimmi allannguutissatut siunnersuutit pillugit ilisimatitsivoq.

Ulloq 1. november 2011 Ataatsimiititaliap Aalisarnermut, Piniarnermut Nunalerinermullu Naalakkersuisumik Ane Hansenimik isumasioqateqarpoq, kiisalu Grønlandsbanken paasissutisseeqatigiilluni ataatsimeeqatigineqarluni, kiisalu Ataatsimiititaliap Pinngortitaleriffimmik kingullermik ulloq 3. november 2011 paasissutissiilluni ataatsimeeqatigineqarpoq.

### **Siunnersuutip Ataatsimiititaliamit suliarineqarnera**

**Ataatsimiititaliaq isumaqatigiittoq** isumaqarpoq aalisarnermi, immikkullu sinerissap qanittuani raajarnarnermi, pitsanngorsaanerit pisariaqartut aamma aaqqissuusseqqinerit pisariaqartut aningaasalersuinissaannut aamma ajornartorsiutaasunut ikiorsiinissamut tunngaviatigut aaqqissuusinnikkut inatsisitigut iliuuseqarnissaq pisariaqartoq.

Tusarniaanermit akissutit tiguneqartut aamma inatsisissatut siunnersuutip siullermeerneqarnerani oqallinneq aallaavigalugu Ataatsimiititaliap maluginiarpaa siamasissumik isumaqataaffineqartoq inuussutissarsiutigalugu aalisarnermi aalisariutinik piginnittut Kalaallit Nunaanni inuiaqatigiinnut aalajangersimasumik attuumassuteqassasut. Ataatsimiititaliaq isumaqarpoq Kalaallit Nunaanni inuiaqatigiinnut aalajangersimasumik taamatut attuumassuteqarneq najukkamut, piginnittuunermut aamma ingerlatseqatigiiffinni piginnittuunermut tunngasut pillugit piumasaqaatit inatsimmi kapitali 4-mi allassimasunit tamakkiisumik qulakkeerneqartut.

**Ataatsimiititaliaq isumaqatigiittoq** isumaqarpoq aamma pingaaruteqartuusooq ingerlatseqatigiiffiit imaluunniit inuit ataasiakkaat pisassat ilaannik toqqaannartumik imaluunniit toqqaannangitsumik pisinermikkut inatsimmi pisassiissutit annerpaaffissaat qaangerlugit sinerissap qanittuani aalisariutini aqutsiffiusumi pisassat ilaannik pissarsisannginnissaat Naalakkersuisut isumannaassagaat.

**Ataatsimiititaliami amerlanerussuteqartut** Inuit Ataqtigiinnit aamma Demokratinit sinniisut naliliipput § 6-p allangortinneratigut aalisariutini kinguaariit nikinnerisa pilertornerusumik ingerlanissaanut ilapittuutaasinnaasoq. Tamatuma saniatigut ilimanarpoq isertitatigut piumasaqaatit sakkukillinerisa allamik suliaqarnissamut tamakkiisumik ilaannakortumilluunniit maanna aalisartut ilaasa misiliinissaannut tamanna ilapittuutaasinnaasoq, kissaatigineqarpalli aalisarnermik pingaarnertut inuussutissarsiornermut uteriaqqittoqarsinnaavoq.

**Ataatsimiititaliami amerlanerussuteqartut** Inuit Ataqtigiinnit aamma Demokratinit sinniisut aamma naliliipput § 6-ip allangortinnera kalaallini inuiaqatigiinni sinerissamut qanittumi aalisarnerup aningaasaqarnikkut pitsaaneruserusumik tunngaveqalernissaanut ilapittuutaassasoq, inuttaasut nunaqavissut suliffeqarfiillu amerlaneruserusut sinerissamut qanittumi aalisariutinut aningaasaliinissamut periarfissaqalerpata.

**Ataatsimiititaliami amerlanerussuteqartut** Inuit Ataqtigiinnit aamma Demokratinit sinniisut isumaqarput siunissami aalisarnerup sunniuteqarluartup, imminut akilersinnaasup sapinngisarlu malillugu imminut aningaasalersortup ingerlassinnaanissaanut, sinerissap qanittuani pisassat amerlanerpaaffissaasa 10 %-imiit 15 %-imut qaffannissaa pisariaqartoq.

**Ataatsimiititaliami amerlanerussuteqartut** Inuit Ataqtigiinnit aamma Demokraatinit sinniisut taamaattumik isumaqarput inatsisissatut siunnersuut saqqummiunneqartoq aalisarnermi aningaasarsiornermik ineriartornermut nutarterinermullu tunngavissaasoq piukkunnartoq.

**Ataatsimiititaliami amerlanerussuteqartut** Inuit Ataqtigiinnit aamma Demokraatinit sinniisut oqaaseqaatit ataaniittut saqqummiuppaat:

**Aalisarneq pillugu inatsimmi § 6, imm. 3, nr. 4 pillugu**

*“Siullermik:*

*Aalisarnermi inuussutissarsiuteqartut, isertitatigut piumasaaqatit sakkukillinerisa malitsigisagaa aalisarsinnaanermik maannakkut akuersissummik peqareersut ingerlaqqissasut.*

*Aappaattut:*

*Siunissami aalisarnermi tunngaviusumik ilinniarnikkut allagartallit kisimik isersinnaanis-  
saannut piumasaaqateqartalernissamik Naalakkersuisut misissueqqullugit kissaatigineqar-  
poq.*

*Taamatullu,*

*Aalisarnerup iluani kinguaariit nikittarnerat aqqutigalugu, siunissami ilinniarnikkut allagar-  
tallit kisimik pisassanik aalisarsinnaanermullu akuersissummik pisinnaassasut matumani  
ilanngullugu misissorneqartariaqarpoq. Tamatuma kingunerissanngilaa, ullumikkut akuersis-  
summik pisassanillu pigisaqartut allannguivigineqarnerinik.*

*Pingajuattut:*

*Inuit nunatsinneersut aalisarnermik ilinniarnikkut allagartaqanngitsut aningaasaliinermikkut  
piginneqataasinnaapput, pisassat aalisarnermillu akuersissutip avataatigut.*

**Aalisarnermi pillugu inatsimmi § 15 imm. 4 pillugu**

*Ataatsimiititaliami amerlanerussuteqartut isumaqarput § 15 imm. 4-p allanngortinneqarnis-  
saanut sinerissap qanittuani raajarniarnermi pisassiissutit qummut killingisa 10 %-init 15 %-  
inngortinneqarnissaat pisariaqalersimasoq.*

*Sinerissap qanittuani raajarniarnermi aalisariutit, ullumikkumut amerlasuut pisoqalisimap-  
put naleqqukkunnaarsimallutillu. Tamatuma kingunerivaa aningaasarsiorsinnaanerup ajor-  
narsiartorsimanera.*

*Amerlanerussuteqartut isumaqarput inatsisitigut allannguinerup kingunerissagaa naleqqus-  
saasinnaaneq, nutarsaasinnaaneq akilersinnaasunngorsaanerlu tunngavissinneqassasoq.*

*Ataatsimiititaliami amerlanerussuteqartut isumaqarput suleriaqqinnissami pingaaruteqartoq toqqaannartumik toqqaannanngitsumillu 15 %-init amerlanerusunik piginnissinnaanermut periarfissat inatsisitigut sinaakkusersuunikut periarfissaajunnaariartuaartinneqassasoq.”*

**Ataatsimiititaliami ikinnerussuteqartut** Siumumit sinniisut oqaaseqaatit ataaniittut saqqummiuppaat:

*Aalisarnermut Inatsisip allannguutissaanut tunngatillugu Siumumiit ikinnerussuteqarluta oqaaseqaatissavut.*

*”Siumumit allannguutissatut siunnersuutit marluk ukua akuersaarsinnaangilagut.*

*§ 6, imm. 3 nr. 4-p §6, imm.4 nr.3-p aamma § 6, imm.5 nr.2-p aamma 3-p atorunnaarsinniarneqarnerat, aappaatullu § 15, imm.4-p allannortinniarneqarnera.*

*Siullermik Siumumiit aalisarnerup ineriartortinneqarnissa nutarterinissarlu assorujussuaq suleqataafigerusupparput suleqataafigiuassallugulu.*

*Kisianni Siumumiit Aalisarnermut Inatsisip allannguutissaatut siunnersuutigineqartut aqutissaangitsutut isigaarput nutarterinissamut ineriartortitsinissamullu.*

*Siullesq 50/50 isertitaqarsimanissamik piumasagaat peerniarneqarnera kikkullu aningaasaatillit suliffeqarfiugaluarunik tamarmik periarfissinniarneqarnerat aalisariutinik piginnittunngortinnissaanut aqutissiuisuunera akuersaarsinnaangilluinnarparput. Siumumiit pingaartilluinnarparput Aalisartut namminersortutut kiffaangissuseqarlutik angallatinik piginnittuunissaat.*

*Taamaammat allannguutissaq 50/50-imik piumasagaateqarnerup atorunnaarsinniarneqarnera Siumumit akuersaarsinnaangilluinnarparput.*

*Malugineqaqqarpullu atuisut tassa aalisartut sinerissap qanittuani tamanna akerlerilluinnaramassuk. Tamannaluuniimmi tusarniaanermi ilanngunneqarsimanngilaaq taamaalillutik Aalisartut qoqassineqartutut taaneqarsinnaallutik.*

*Allannguutissap aappaa § 15, imm. 4-p allannortinniarneqarnera Siumumiit akuersaarsinnaangilarput. Tamatumani maannakkorpiaq pinerput raajaratassanik piginnittuuneeq, maannakkut pisassiissutit 10%-iinik piginnituusinnaatitaapput taammalu allannortinniarneqarpoq 15%-imut qaffallugu, tassagooq raajarniat akilersinnaasumik ingerlalerinissammata, rajarniarnerup ilungersunartumik ingerlanera arajutsisimanneqanngilaaq Siumumiit, taamaammat pitsannngorsaanissamik suliniuteqarnissaq piumasuseqarfigilluinnarparput, aalisariutit ullumikkut atorneqartut pisoqalivallaarsimapput iluarsartuuisarnerup annertualaarnerata akilersinnaanerusumik aalisarnissaraluaq killilersimaarpa, taamaammat angallatigissaanissaq Siumumiit suleqataafigilugulu peqataafigissvaraput.*

*Ullumikkut raajarniat pisassanik piginnittuusinnaaneq qummut killinga 10%-iussoq namminersortup ataasimaaluuniit naamassisimanngilaa, raajarniutit pisassiissutinik 7-10% tungaanut pigisaqaraluarunik akilersinnaasumik ingerlasinnaanerat Siumumiit qularutiginningsigut 15%-imut qaffannisaat akerleraarput.*



*Siumumiit aarleqqutigaarput 15%-imut piginnitussaaneq qaffanneqaraluarpat piginnittuusinnaasut ikittuarannngornissaat taamaalilluni politikikkut siunniussa q piginnittuunerup siammarnissaa killormut ingerlasussaavoq, ingerlatseqatigiiffiit pigissaarnerusut pisassa qarnerulissapput pissakinnerusullu kingusinnerusukku isiginnaartuinnangussapput.*

*Taamatut allannngortitsiniarneq susassa qartorpiaat akerlerilluinnarpaat taakkulu tusaaniarneqanngilluinarput. Illuatungaanit raajartassanut toqqaanartumik "attuumassuteqanngitsut" kissaattaat kisimi amerlanerussuteqartunit tusaaniarneqarput, naatsumik oqaatigalugu peqarnerit pitsaasumik periarfissinneqassapput, pissakinnerillu nungutinnissaat aqutissiuunneqalerlutik. Tamanna Siumumiit akuersaarsinnaanginnatsigu inatsisip allannguutissaa akuersaarsinnaangilarput.*

*Siumumit piumasaraarput inatsit pineqartoq allannngortinnnginnerani sinerissap qanittuani aalisarneq pillugu pissutsinik misissueqqissaartoqassasoq. Misissueqqissaarnerup takutissavaa sinerissap qanittuani suut aqqitassaanersut, tamatumalu takutikkumaarpaa aalisarnermut inatsimmi suut allannngortittariaqarnerusut.*

*Inatsisip allannguutissai pinngikkallarnerini Inatsisit putoqarneri siullugit iluarseqaarnissat Siumumiit kissaatigaarput, soorlu pisassanik piginnitussaaneq 10%-iugaluartoq ullumikkut tamanna qaangeqalugu piginnittoqalersimammat tamatuma aaqeqqarnissaa sulissutigineqaqqaartariaqartoq ikinnerussuteqartut isumaqarput.*

*Taamaaliornikkut sinerissap qanittuani aalisartut amerlanerit isumaat naamassineqarsinnaasutut isumaqarfigigatsigut. Siumumiit nalunngilluinnarpaarput kikkut tamat isumaat eqqorlugu aaqiissinnaanata, Inatsisillu allannguutissai attuumassuteqarnerpaat tamarluinnarmik sakkortuumik akerlaeraat. Ikinnerussuteqartutut kissaatigaarput sinerissami qanittumi aalisartut qanimut tikillugit oqaloqatigilluareernerisugut iluarsartuuseqqinnisaq pisarisartoq, susassa qartut qarsuanagit tusaallugit peqataatillugit tassa Siumumit anguniagarput."*

### **Siunnersuutip aningaasatigut kingunerisassai**

Ataatsimiititaliap maluginiarnikuuaa Naalakkersuisut oqaaseqaatini nalinginnaasuni siunnersuummi aningaasatigut kingunerisassat allassimagaat. Taamaalilluni Ataatsimiititaliap tatigaa Naalakkersuisut apeqqut manna sukumiisumik misissorsimagaat, aamma innuttaasunut aamma inuussutissarsiummik ingerlatsisunut sunnerneqartunut aningaasatigut pitsaanngitsumik kinguneqartitsisoqalissasoq. Naatsorsuutinngisamilli pissutsinik pissusissamisuunngitsumik inatsisissatut siunnersuut kinguneqassappat, Ataatsimiititaliap qularutiginnilaa Naalakkersuisut pisariaqanngitsumik utaqqinatik tamanna inatsisit naqqiissuteqarfiginerisigut iluarsiniassagaat.

### **Ataatsimiititaliap inassutai**

4. november 2011

UKA 2011/35  
(FM 2011/88)

**Ataatsimiititaliami amerlanerussuteqartut** Inuit Ataqatigiinnit aamma Demokraatinit sinniisut Inatsisartuni aappassaaneerinninnermi inatsisissatut siunnersuut saqqummiunneqartoq **akuerineqassasoq inassutigaa.**

**Ataatsimiititaliami ikinnerussuteqartut** Siumumit sinniisut Inatsisartuni aappassaaneerinninnermi inatsisissatut siunnersuut saqqummiunneqartoq **itigartinneqassasoq inassutigaa.**

Taamatut oqaaseqarluni isumaliutissiisummilu allassimasutut paasinnilluni Ataatsimiititaliap siunnersuut aappassaaniigassanngortippaa.

4. november 2011

UKA **2011/35**  
(FM 2011/88)

Aqqaluaq B. Egede  
Siulittaasoq

Niels Thomsen  
Siulittaasup tullia

Hans Aronsen

Juliane Henningsen

Karl Lyberth

Finn Karlsen

Hans Enoksen